



## Prooemium.

**D**Rinceps ille DEUS, ut suam hominum generi majestatem demonstraret, rerum in hoc Natura teatro quasdam ἀσπνήτας καὶ ἀφθάρτους effinxit. Harum Catalogo caelestes accenseri optimum censuit, quæ suos perrenni motu cursus conficerent, non verò generando sese multiplicarent, ac quandam post funera (dixisse liceat) sobolem relinquerent. Alias contra immortales constituit & caducas, easq; quò suam singula speciem tuerentur, justâ sese lege perpetuare sapienter ordinavit. Hujusmodi sunt, quæ infrâ Lunam concinno visuntur ordine digestæ, eaq; difformi ad interitum à Naturâ decretum tramite decurrentes. Aliter enim Elementa dispereunt: Viventia aliter: aliter ex Elementis orta. Primi ordinis corpora mutuis quasi confici vulneribus: Illa morte: Hæc Putredine extingui constat. At non frustra DEUS O. M. istiusmodi generationum & corruptionum vicissitudines in hoc Elementari tractu fieri vult, sed nos de ipsarum causis sedulò ut cogitemus, ut ita, quàm potens ac mirabilis sit in operibus, cognoscatur, nostròq; unâ commodo dextrè prospiciatur. Nam quid utile magis & necessarium cujuslibet artis Anagnostæ, quàm Physicam mortis Originem probè perspectam habere. Quid Medicis juxtim ac Philosophis magis ex usu, quàm Putredinis Natales accuratè cognosse. In Medicâ nullius sanè Rei crebrior fit mentio. Quid? quòd multa hujus Artis Theoremata solidè exponi, plurimiq; morbi in Homine à Putrefactione profecti judicari nequeant, si, quid, qualis sit, & cur existat, illa nesciatur. Philosophi quoque ex multis de Naturâ dubitationibus, & doctrina Aristotelica partibus absq; nervosâ hujus materiæ teoriâ sese vix expedient. Argumento nobis sunt acerrimæ inter Φιλοσοφώτατες semper motæ de hâc Re controversiæ, dum nonnulli hoc, nonnulli aliud statuerint, & cui palma decernenda, adhuc sub judice lis sit.